



Орган Лемковского Союза

Выходит в каждый четверг.

Редакция и администрация в Крынци. — Адрес „Лемко“ Крыница.

БОЛЯЧКИ СЕЛА.

Положене господарче нашого села ест ище все барз тяжке. Незначна поправа цін статку и землеплов не заспокоює ани в части потреб села.

Село не може ище купувати ани штучных навозов ани потребных ему рольничих машин, а увеличаюче ся число сельских безработных стає ся правдивом бідом села. Біда тотя докучат в першой мірі селам положеным в горской окрестности Карпат, где грунты сут яловы и сильно роздроблены.

Безработны в містах по утраті выполненной через отвітний час работы, достают запомагы, або якуси помоч, особенно в зимі, **а сельскы безработны лишены сут той помочи и мусят числити лем на себе и людске милосерде.**

В каждом селі десятки людей бідую, мерзне и живе в окропных материяльных условиях. Біды той не видно може так, як в місті, бо хлоп ест с натуры не смідый и крыве ся с ньом, але біда тотя ест страшна и може аж и больше, як по містах.

Перед войном с каждого нашего села выїзджали праві с каждой хаты люде до Америкы и робячи там по „майнах“ и при „балирах“, присылали свой заробок родині, помагуючи ей таким способом, або кудуючи фалаток грунту.

Тепер сельске населенє емигровати не може, росне отже с року на рок число безработных на селі. Для тых людей мусит ся найти якуси ередства удержания и роботу, бо нїт нич небезпечнійшого, як таке положенє, коли люде хотят робити, а не могут найти работы.

Часть той работы для сельских безработных мусит найти само село. Все и во всем повинни мы памятати, же часы падаючей с небаманни давно минули, же мусиме сами дбати и старати ся о себе и же без наших власных старань нам никто не поможе.

Прото тыж и в справі сельского безработи село уж завчасу мусит добре призадумати ся над тым, як и што робити, штобы тотя болячка не розросла ся и не стала ся опасном. Даст ся того зробити лем через отвітну экономичну организацию села.

При каждом кооперативном склепі, основаном в селі, найде роботу и заробок хоц двоих до трьох безработных, а коли такой sklep роз-

вине діяльність на всі галузи сельского господарства, може он дати роботу десятом а може и больше безработным.

Добре розвивающий ся кооперативный sklep заохотит людей до дальней господарчей организации. Где будут ку тому добры условия, там оснуют на певно люде кооперативну молочарню, або вытворят домашний промысл (ткацкий, коникарский, выправы овечьих скор, шитья кожухов и т. д.), а в дальнейшем развитию кооперации оснуют свою касу, выбудуют народный дом и т. д.

Много людей може затруднити также садоводство. При садах ест больше работы, як при рольничтві, але сады дают и значно вышши доходы. В минулом році ціна овочей была барз низка, але и так платило ся найменше по 20 гр. за 1 кг. яблос, отже 20 злотых за сотнар.

Рахуйме, же с одной яблони было лем 2

сотнары яблос, то дала она 40 зл. доходу, невеличкий сад отже зложеный лем с 10 яблосней мог принести 400 зл. Если кто задержал яблоса до зимы, то мог мати 2 разы вышший хоєєн.

Сады на загал в нашем климаті розвивають ся добре, а гандляры охотно навет купуют яблоса с горских садов, бо они сут твердши, ядернійши, дают ся добре перевозити и не гниють так скоро, як овочи с садов низинных.

Сады могут спричинити розвити ище одной галузи домашнего промысла, а именно перелілки овочей на овочевы вина, повила, мармеляды, галареты, овочевый оцет и т. д. и ту знова нашла бы ся работа для охотных рук.

Як с того видно, сут ище на селі великы возможности найти роботу и заробок, лем треба конче сорвати с давныма способами господаркы и примінити сельскы господарства до теперешных условий и бымог. Чим скорше то-то зробиме, тым лучше для нас и для сельских безработных, ждущих на роботу.

—ооо—

В справі остаточного упорядкования рольных долгов.

Заряд Союза Рольных Палат и Рольных Организаций разом с послами и сенаторами, репрезентующима сельске господарство, передал г-ну вице-премеру Квятковскому мемориал в справі остаточного упорядкования рольных долгов.

В долгом, основательно зредагованом мемориалі поднесено меже иным, же поправа в сельском господарстві не має ище цїх требовности и же чим больше грошей даст селянин на заспокоєне долгов с перед крызыса, тым меньше остане ему материяльных средств на поднесене господарства сельского.

Если отже село хоче ся двинути, а то-то ест справом цілой державы, то мусит ся зменьшати долги селян с часов перед крызысом.

При порядкованю рольных долгов не можна сперати ся на том, же хлоп бідю перетримат, лем мусит сз дати хлопц возможность двинути ся господарчо. Если ся взяти под роззатг пинши державы, то отдолженє в Польщі прибрало малы розміры — так в области обнижения капитала, як и процентов, наконец в области рестерминования уплаты рат.

Ту расходит ся не лем о облегченє сплаты долгу, але факже и обниженє высоты должных сум, котре мусит быти таке, штобы дало возможность господарствам розвивати ся и подносити.

Належит дати пару возможностей упорядкования sprawy задолжения господарств сельских. Для меньше задолженных выстарчат льготы, якы мог бы селянин достати через уділенє ему долготерминной, низкопроцентной пожиткы. Для задолженных сильно остане угода с кредиторами, котры годят ся на сплату им лем части долгу.

Проект мемориалу предлагат обнижити сельскы долги о 40 процент и уважат зменьшенє долгов, обтяжающих малы сельскы господарства за постулат конечный.

Чи дал ты уж жертву на Руску Бурсу в Горлицах? Если ні, то зроби то, як най-скорше!!!

ЗАСІДАНЄ ЛІГЫ НАРОДОВ.

Засіданє Лиги Народов мало ся зачати 17. січня. Але тепер Лига Народов втратила уж своє значенє и никому ся на засіданє не спішит. Франция, а за нѣм и Англия внесли предложєнє, штобы отдалити засіданє.

На засіданє Лиги Народов с Польщи выїхал министр заграничных справ Бек. По дорозі вступил он до Берлина, где отбыл он ряд конференцій с Гитлером, Герингом и министром пропаганды Геббельсом.

Темом бесід было загальне положєнє в

Европі и польско-німецькы отношеня. Обі сторони ствердили, же сут они поправны и укладают ся добре.

Договор польско-німецькый с 26. січня 1934 року не втратил нич через чотыры роки, а противно являт ся он тревалым чинником гваранции добрых сусідских отношень меже обома народами.

Министер Бек по визиті в Берлині, выїхал на короткий отдых до полудневой Франции, а оттамаль на засіданє Лиги Народов.

Франция має нове правительство.

Причином жаданя отложеня засіданя Лиги Народов через Францию до 26. січня был факт, же во Франции уступило давнє правительство Шотана, оперуюче ся на радикалах, социалистах и комунистах, (тзв. „народный фронт”) и треба было выбрати новє правительство.

С выбором тым мала Франция дост клопотно. Президент Франции Лебрен повірил найперше утворити правительство радикалови Бонетови, але тото ся не вдало, так як не вдало ся склеити правительства и социалисту Блюму, аж наконец давный премьер Шотан взял ся знова до утворєня правительства и утворил єго, оперуючи ся на радикалах и партиях уміркованых.

Социалисты до правительства не вошли,

але прирекли поддержку в парламенті. Комунистов поминено. Таким способом розбито „народный фронт” во Франции.

Згода меже Англиом и Ирляндиом.

Также и Англии не на руку был термин засіданя Лиги Народов в дні 17. січня, бо в том часі приїхал до Лондону президент Ирляндии, де Валера.

Ирляндия по введєню в житє новой конституции стала ся совсем независима политично. Ирляндии розходит ся лем о прилучєнє полночной части острова т. зв. Ульстер.

Тоту закутину населят однак населєнє протестантске, котре радше хотіло бы належати до протестантской Англии, чим до католицкой Ирляндии. Прото тыж рішено, што о при-

лучєню Ульстеру задецудуют выборы до парламенту Ульстеру, котры мають ся отбыти в лютѣм.

Де Валера приїхал до Англии, штобы обговорити справы господарчи. До того часу Англия и Ирляндия вели меже собом безпрерывну, тиху, але завязту борбу господарчу. Ирляндия, яко слабша, вычерпала ся скорше и прото тыж тепер рада бы погодити ся.

Англии знова ходит о тото, штобы на всіх Брытійских островах могла мати оборонны базы на случай войны. Тому то до угоды пришло легко, бо обі сторони здают собі справу с того, же згода принесє им хосєн.

Югославский министр в Берлині.

Німецькый министр заграничных справ был в черєні мин. р. в Бельграді, а в січні т. р. поїхал до Берлина югославский премьер и одновременно министр заграничных справ — Стоядинович.

В часі принятя выданого в єго чєсть, німецькый министр Нейрат и Стоядинович выголосили бесіды, в котрых подчеркнули добры отношеня политичны, господарчи и культурны, меже обома народами.

Оба народы стоят на сторожі удержаня мира в Европі и керуют ся кличем: „дбати о добро власне и шанувати добро чужє”. Тот клич єст гваранциом приязни Югославии и Німєччины.

—ооо—

Трагедия молодого стражника.

— Така нєч, як днєшна єст барз добра для контрабанды, — повіл стражник Кучера до свого товариша Устьянского, як оба ишли до ліса.

Нєч была наравду барз темна.

От пару годин ситіл дождж, два стражники грузали по болоті.

Кучера не рад был с того. Он воліл выспати ся в теплої комнаті, як гнати ся по нєчах за контрабандыстами.

На домір злого додано єму до товариства Устьянского, котрый цїлий час не отозвал ся ани словом.

Устьянского не любили товариши. Он был несловоохотный и сторонил от людей. Не мал приятелей. Але зато начальство было с него барз вдоволенє.

Устьянский выполнял точно всі приказы и поручєня, все перший голосил ся до службы, если ходило о опасны выправы и в часі долготной службы не мал на совєсти ани одной провины.

Тым разом с розмыслом выслано го в тоты страны, бо походил є сєла, в котром мали крыти ся шмуглеры и знал добре терєн.

Коли Кучера звертал ся до него с пытаниями, отвічал одним словом, даючи поняти, же не має охоты до бесіды, Устьянский думал о своей родині, о отци, братях, сестрі, своей родной хыжі.

Наближали ся уж до сєла. За парунадцєт минут будє перед домом, в котром прожил дїтячи літа и молодость.

Устьянский скоро мусіл розстати ся с родином. С отцом жил в найліпшой згоді, але братя не любили єго и всіма силами старали ся єго позбыти. Не потрафил ся им противєставити и прото оставил родину и вступил до стражи граничной.

От того часу минуло уж пару літ. Молодой стражник не писал през тот час до дому, ани там не їздил. Тепер наконец зайде до отца и побєсїдує с ним о вшитком.

Нагло оба стражники услышали якыйсь подозрительный шум. Устьянский вынял скоро револьвер и крикнул:

— Станути, бо стрілям!

Никто не отозвал ся. По якомєи часі стражники зас почули, же ктоєи передєрат ся през крякы. Якаєи тїнь высунула ся с ліса и знов скрива ся в гущавині.

Стражники пустили ся за нѣм и почали стріляти. Але шмуглер потрафил втечи. Оставил лєм мішок с контрабандом, котрый забрали стражники.

Устьянский при світлі електрычной лямпы спостерєг слїды, провадячи в глубину ліса.

— Вертай на постерунок — сказал до Кучеры, а я пойду сам дальше. Прєця го и так уж не сїмає. Але може найду хоц их хованку.

— Добре — згодил ся дораз Кучера, котрый так тужил за постелью. Розстали ся. Устьянский остал сам. Освічаючи собі дорогу електрычным лямпом, с револьвером в руці, ишол дальше.

Слїды провадили до сєла.

— Кто знат — подумал нагло — чи тот шмуглер не єст моим знакомым, а може и товаришем с молодячих літ. Тепер сут тяжкы часы. Каждому бїда докучат. Але трудно. Мушу быти безвзглядный, бо „служба не дружба” и я присягал и мушу робити, што до мене належит.

Нагло слїды скрутили в сторону. Стражникови забило сильно сердце. Тепер уж мал певность, же хлєп, за котрым ишол, скрутил в сторону єго родной хаты.

Мусіл ити за ним. Служба му так казала. По пару минутах нашол ся перед хатом своего отца. Со-стисненым от боли сердцем справдил, же шмуглер скрив ся в той хаті. Слїды были так выразны, же не мог ся мылити.

Долго стоял перед хатом, не знаючи, што робити. Забракло му отвагы. По долгом колебаню, отхылл лєм дєвери єтайні и погласкал два коники, котры так добре памятал с давных часов и погодившиє, том самом дорогом, котром пришол, вернул на постерунок.

Через цїлу нєч ани ока не зажмурил. О свитаню сїл коло стола и написал рапорт. В рапорті подал точно выслїды своих бадань, зазначаючи, же не мог сам рішити ся на ревизию, бо в той хаті жиє єго отец и братя.

Рапорт тот по двох годинах достал комендант постерунку. Выслаз дораз пару стражников.

Ревизия дала обыльны результаты. Найдєно дуже шмугльованых товаров. Стражники арєстовали старика Устьянского и спровадили єго на постерунок. Сынам удало ся втечи и укрыти в лісах.

Комендант постерунку, вдоволеный результатами, постановил безотложно написати до властей, штобы вызначили нагороду молодому Устьянскому.

Он выбрал ся сам до комнаткы, где жил Устьянский, штобы му тото повісти.

В дєверях станул, як скаменілий.

На подлєзі, в кырви лежал молодой Устьянский... Был уж мертвый.

Молодой стражник не мог зломити службову присягу, а также не мог пережити того, же спричинил арєст своего отца и застрілил ся.

—ооо—

Нарады трьох держав в Будапешті.

Меже Австрією, Італією і Венгриєю є договір заключений в Римі в р. 1934.

На основі того договору с'їхалися в положенні січня т. р. представителі тих трьох держав в Будапешті. Конференцію тому скликала Італія, щоб Австрія і Венгрія: 1) признали правительство ген. Франко, 2) приступили до пакту противкомуністичного и 3) выступили с Лиги Народов.

Крім того высунено на конференції справу рівних прав для вооруження Венгрії. Австрія і Венгрія виразили згоду относительно всіх выдвинутых справ, крім Лиги Народов, с котрою хотят дальше содієствувати помимо выступления с Лиги Італії.

С Лиги выступили бы аж втотчас, коли бы в Лигі повстали два бльоки держав — выступающих против собі.

Державы признают Абисинию Италии.

Голландия и Бельгия признали уж Абисинию за часть державы итальянской. Так само родятся признали Абисинию Італії Данія, Швеція и Финляндія. Лем одна Норвегія стоїт твердо на точці независимости Абисинии.

Так то серед сердечных приятелей псы зажерли зайца.

Початково всі державы выступили остро против Італії и заявляли, же не дадут зроби кривды Абисинии, а тепер одна держава за другом годит ся с фактом и признає, же Муссолини правильно поступил.

В Румунии розвязано парламента.

Король румунский Кароль II. розвязал румунский парламента. Причиною того являют ся факт, же ново выбране правительство с Гогом во главі не мало большинства в парламента.

Выборы до нового парламента сут назначены на 2 и 4 марта. Оппозиция ся лучит и группы оппозиции вірят, же при выборах прав-

ительство Гого не здобуде ани 30 процент голосов.

Оппозиция предостерігат правительство и короля перед диктатурою, котра принесла бы королевии спротив народа и ослабила бы Румунию.

—ооо—

Велика цисарска нарада в Японии.

Цисарскы нарады, в котрых принимают участие сам цисар Японии, сут барз рідкы и скликає ся их лем в барз важных случаях.

В истории новожитной Японии скликано 4 разы такы нарады. Перша — в 1895 р. перед войном кытайско-японском, друга — в 1905 р. перед войном с Росією, третя — в 1914 р., на котрой ухвалено, же Япония має принять участие в світовой війні и четверта — тепер.

Уж тот сам факт свідчит, же нарада относилась до совыть незвычайной вагы. На той нараді ухвалено не признали теперешного кы-

тайского правительства Чанг-Кай-Шека.

Тымчасом кытайскы войска отіосят побіды. Отіили с японских рук місто Тсинан, важный стратегический пункт в провинции Шантунг.

400-тысячная армия под начальством самого Чанг-Кай-Шека распочала генеральну офенсиву и має поважны успіхы. Войска Внїшней Монголии, находячи ся под впливами Совітов, перешли также границу утвореной через Японию Монголии Внутренней и идут побідоносно вперед.

Перша сесия совітского „парламента“.

Перша сессия совітского „парламента“ тревала всего лем оден тыждень (от 12 до 20 січня). Уж тот сам факт доказує нам, же совітский „парламент“ єст лем сыпанем пороху до очей и охотом показати світу свободу.

Звычайно по инних державах на так короткый час скликають парламента лем в часі войны, коли расходит ся о ухвалене полномочий для правительства, а не о ухвалене тих чи инних законов.

Совітский парламента являют ся именно таким военным парламентом, котрый выразил признательность Сталину и другим кремлевским верховодам, угостил ся и тым закончил роботу.

Он одноголосно принял всі передом уж обдуманы рішення и высказал „на страх врагам внїшним и внутренним“ патриотичне единство и боевой энтузиазм.

Але нас можуть заинтересовати не так самы ухвалы совітского „парламента“, як его склад. Голосно кричит ся, же Совітска Росія — то страна работников и хлопов, слідовательно треба бы думати, же и парламента буде заповненный переважно работниками и хлопам.

Тымчасом так не єст. Помимо того, што в

Совітской Росіи єст всего не полны 2 миллионы членов комуністичной партии, а населене выносит понад 170 миллионов, до одной с палат того парламента, т. зв. Совіта Союза выбрано 461 комуністов и 109 безпартийных, отже на 81 процент комуністов 19 процент безпартийных.

Не дуже лучше представляют ся справа выбора послов до другой палаты совітского парламента, т. зв. Совіта Национальностей, где на 574 депутатов єст комуністов 409 т. є. 71 процент, а безпартийных 169 т. є. 29 процент.

Если ходит о хлопов, то в первой параті єст их всего лем 130, а в другой 110.

Числа тоты не потребуют пояснень. Они сами говорят, як справедливо были переведены там выборы, если ничтожна горсточка членов комуністичной партии выбрала до одной палаты 81, а до другой 71 процент своих депутатов.

Зрозуміла річ, же депутаты комуністы будут все голосовати за тым, што предложит до голосованья их штаб со Сталином во главі.

Каже Сталин тішити ся, же переводит ся „чистку“ троцкистов, шкідников, диверсантов и шпїонов — будут ся тішити и голосовати за

тым, штобы ище лучше чистити и стріляти, прикаже Кремль станути, станут всі, а позволит сісти — сядут тихо и смиренно.

В Совітской Росіи прибыли лем новы назвы, в роді такых як конституция, Совіт Союза, Совіт Национальностей и инши, але в сути самой нич ся не змінило. Царит там дальше страшный гнет, ограничене личной свободы и кнут Сталина и его поплечников.

КОМУНИКАТ

в справі світла при роверах.

В „Мониторі Польском“ с дня 3. січня 1938. № 1. было оголошено объявление Министерства Коммуникации с дня 22. грудня 1937. в справі принятия типов отблескового шкелка при роверах.

Повітовы староства, подаючи высше поміщене объявление до відомо, завзывают посідачей роверов, уживающих роверов до руху на публичных дорогах, штобы отвітно до постановлень § 5. заядження Министерства Коммуникации и Справ Внутренних с дня 15. VII. 1937. Дн. З. Р. П. № 58. поз. 458. заосмотріли свои роверы с отблесковы шкелка усталеного тыпу. Также властители склепов с роверами, при продажи навых роверов, повинны заосмотріти их в вымаганы отблесковы шкелка. Кто буде уживати до руху на публичных дорогах незаосмотренных в приписаны шкелка роверов, буде потярненный до отвітственности через органы контролі дорожного руху. Зазначат ся, же уживане отблесковых шкел на роверах лежит передовсем в интересі власной безопасности роверистов в часі їзды.

Як живут хлопы в Дании.

Тому, кто нигде не был и нич лучшего не виділ, здає ся, же не можна жити иначе, лем так як он живе. Такой человек и не стремится до переведения змін в своей хаті и в своем господарстві, бо и не знає, як их перевести, он робит и живе так, як жили его родичи и предки.

А однак єст дуже краєв, где хлоп живе значно лучше як у нас. До такых краєв належит в первой мірі Дания. Не думайте однак, што єст там так плодоносна земля, же маєток сам горне ся до хаты. Ніт! Там єст край низинный, положенный частями ниже уровня моря и в многих місцах мочароватый.

Великы шкіды могут вырядити там розливаючи ся рікы, або вода с моря. Але мудрый тамтешный хлоп забезпечил ся перед том бідом и по обох берегах рік а также на берегу моря побудовал сильны, величезны греблі и тепер лем уважат, штобы вода греблі не сорвала.

Мочары осушил и замінил на урожайны луки и пасовиска, а робячи систематично и безпрерывно и отдаючи ся в свободном от работы часі охотно науці, приіош тамтешный хлоп до добробыта и маєтку.

Средства, які его обогатіли сут слідующи: 1) висока образованность тамтешного хлопа, 2) давно переведена аграрна реформа, 3) брак великих земских маєтков, а также господарств занадто малых т. зв. „карликовых“. — До того треба додати ище велике трудолюбие и велику привязанность тамтешного хлопа до землі, а также и того, што Дания не переживает воен ани революционных безпорядков, в виду чого нич не нищит доробку хлопа.

Продолжене в слід. числі.

ШТО ЧУТИ В СВІТІ І В КРАЮ

Бесплатный готель в Англии. Недалеко Лондона лежить місто Рочестер. Єст то бодай найстарше місто не лем в Англии, але може в цілої Европі.

Місто того отличат ся и тым, же от пере-шло 300 лт (от р. 1579) находит ся там дом, в котром каждой ноци може бесплатно переночевати 6-ох подорожных, котры не мают грошей на того, шобы заплатити за ночлег. Дом тот называт ся „Дом Бата“.

Бат был купцом в Рочестер в 16-ом столітї. Он доробил ся значного маекту. Умеравши, оставил он свой дом для ужитку для бідных подорожных и заряд его отдал магистратови міста Рочестер.

Ведля его тестаменту достає каждого дня подорожных - бідаков за дармо постель, вечерю, снідання и на дорогу 4 пенсы.

Бат застеріг собі, же не могут користати с бесплатного ночлегу: шельмы, ошусты и адвокаты, а инши мусят подати ся слідуочим узробиям.

Каждый, кто хоче переночевати за дармо, мусит еходячи до дому, знати свою обу и обути пантофлі, якы достане от заряджаочого готелем, перед вечером мусит каждый выкупати ся, ідо має быти для всіх одынакове и т. д. Также не могут подорожны ночевати по дві ноци под ряд.

Тестамент того филантропа єст респекто-ванный до тепер, змінило ся лем одно, же вмі-сто 4 пенсы дают тепер на дорогу оден шиллінг. Зміну тоту перевели тому, бо фонды на тоту ціль позволили подвыщити грошечу запо-могу. С бесплатного ночлега могут користати всі національности.

Незнаны фундаторы. Велику сенсацию выкликала недавно появлєне ся в реставра-ции на станции в Варшаві двох людей, котры запросили всіх кто был лем на станции на го-стину до реставрации, казали подати ріжні закускы и напитки и вшитко платили. Гости-на трєвала 15 годин и через тот час зміняли ся гости, а неоден с них достал ище 5 злотых на дорогу. Наконец в реставрации забракло за-куску и напитков. В тотчас незнакомы запла-тили рахунок, котрый выносил 3000 злотых и пращаны оваційно, отіхали. Кто сүт тоты два мужчины, котры оказали ся так гостинными, не дало ся усталити.

Заговор на грецкого короля. Полиция гре-цка выкрыла тайну организацию, во главі которой стоял б. ген. директор грецкой полиции Полихнопулос и котра намірала убити ко-роля грецкого и премера Метаксаса. Убийство мало наступити в катедрі в часі вінчания пре-столонаслідника. Заговорщиков и Полихно-пулоса арестовано. Полихнопулос перед шару літами намірал убити Венизелоса.

Премер Метаксас скликал в звязи с тым заговором конференцию с представителями державных властей. Кромі доносят, же завоз-вано грецку армию быти готовом на всякий случай.

Китайский генерал страченный за зблуду. Недавно засудил китайский военный суд на кару смерти китайского генерала Тан-Фу-Чу

р. симушной помощи для безработных!

Памятайте

за того што он выдодал ся с войском, не став-ляючи належитого отпору японским войскам, в виду чого значне число кытайского войска поддало ся. Кару смерти выполнено.

Катастрофа чешского самолета. Трехмотор-ный чешский самолет бомбовоз уляг катастрофі на линии Прага-Берно. В катастрофі спалило ся трох летчиков, меже нима начальник 5-го летничого полка Маршалек.

Чудом спас ся от смерти. На дорезі под Тухольом мал місце незвычайный випадок. На ровері іхал листонош, на котрого наіхал тя-гарный самоход. Листонош в последном мо-менті спостерел грозичу ему опасность и вы-скочил на перед самоходу. Тым способом спас ся от сильного покалечения, а може и от смер-ти. С ровера остали лем кавальчики.

Новый вице-министр внутренних справ. На тласну просьбу освобождено от должности вице-министра внутренних справ Юрия Па-цюрковского, а на его місце именновано вице-министром справ внутренних дел переизбранного воеводу варшавского Наконечникофф-Клюков-ского. Варшавске воеводство обнял б. вице-министр Пацюрковский.

Советы выселили всіх немецких инжене-ров. Газеты лондонскы доносят, же Советы рі-шили выселити с российской территории всіх ні-мецких граждан. До тепер выдано уж пере-шло 50 граждан немецких. Серед выселєных находят ся инженеры, котры уж от долгого часу были zatrudнены в фабриках и пред-приемствах.

Выкрыты шпионской аферы в Италии. Га-зеты с Риму доносят, же фашистowska поли-ция выкрыла широко розгалужєну шпионску организацию советску, котрой отділены были розміщєны праві по всіх містах в Италии.

Руководителем той организации был со-ветский инженер Григорьев, близкий фаме-лиант Сталина. Григорьева арестовано и за-суджено на кару 30 літ вязницы. Кромі него арестовано 13-ох инших советских шпионов, котрых засуджено на кары 10—20 літ вязни-цы. Меже арестованыма находит ся оден боль-шевик-поляк. Члены той организации занима-ли ся промысловым шпионством уж от 2-ох літ. Головна их кватера містила ся в Меди-олані.

Советский корабель в опасности. Газета „Афтен постен“ выловил радио телеграм, до-

носящий, же советский „ледокол“ „Мурманск“ який выіхал, шобы отнайти загинуєну экспе-дицию полярного слідителя Папанина, нахо-дит ся в опасности. На 76 градусі полярной геогр. ширины и 5 градусі западной долготы попал „Мурманск“ меже лєды, котры стисну-ли его так, же не може ся с них освободити.

20 жертв в школі. В місцевости Загрівє на границі естонско-советской, спалил ся цілкові-то школьный будынок. Пожар повстал в часі науки. Серед дітей повстала паника, а же часть клєс містила ся на 1. поверху, діти по-только ся страшно, а 10-єро было потратова-ных с поломаныма руками и ногами.

Землетрясєне в середной Америкі. В Мек-сыку и в Сан Сальвадор отчүто понад 18 под-земных вєтрясєнь. В Мексыку трясєне было слабє и не потягнуло жертв в людях. Натоміст в Сан Сальвадор трясєне спричинило поважны шкіды, причом не обышло су без жертв в лю-дах. По перших вєтрясєнях населєне утекало с хат и хоронило ся в садах и на полях. От землетрясєния была перервана телефонична и телеграфична звязь, позанадали ся брукы на дорогах и западо ся и розвалило много домов. Правительство выслало спасательны экспеди-ции до місцевостей, навіщєных землетрясєнем.

ДЫРЫГЕНТ церковного и свєтского хору, организатор театральных кружков, добрый ре-жиссер — прийме посаду за малым вынагород-женєм.

Зголошеня приймає Редакция „Лемка“, Крыница 2 под „Дырыгент“.

В Редакции „Лемка“ в Крыници можна достати ріжны книжочки религийного со-держаня.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.

НЕХАЙ ЯКНАЙСКОРШЕ

за асекурує ся
в асекураційном Товаристві
ВИТА И КРАКОВСКЕ
во ЛЬВОВІ

Асекурацию принимают на цілої Лемковщині
представителі: гг. Осиф Яновичкый — Крыница - Сєло
и Михаил Перелом — Сянок.